

Die Kerb

Ich bin e Straußbu aus de Palz,
genau aus Mackebach,
un hann desjohr zum erschte Mol
die Kerwe mitgemach.

Do hat mei Oma mer vezehlt,
wie des als frieher waa.
*„Des war domols in unserm Dorf
de heegschte Feiederdaa.*

*Do hann die Leit es Haus gestrich
un inne ganz gebutzt.
Die Määd hann neie Klädcher griecht,
die Hoor war'n frisch gestutzt.*

*Die ganz Verwandtschaft hat sich do
dem Feschtschmaus eigelaad
un hat zum Guck am Kerwegeld
fer die Kinner net gespaat.*

*Als Vorspeis hat's dann Fläschnsupp gäb
mit Kleeßjer aus em Mark,
dann `s Flääsch mit sau're Gummere
un Meerrettich ganz stark.*

*Dann war die Brotworscht uff em Disch
mit neiem Sauerkraut.
Als Nachtisch dann was Sießes noch.
Kaum war der Kram vedaut,
doch hat's no Kaffee schunn geduft,
un der war grad getrunken,
do hat die Hausfräa aa schunn ball
zum Nachtesse gewunk.*

*Sie hat dann Brotefläsch serviert
un Nudele mit Soß.
Am Herd un in de Stubb do war
de ganze Daa was los.*

*Die Wertschafte in Mackenbach,
die war'n gerammelt voll;
un mittags bei de Kerweredd.
do war die Stimmung doll!*

*Gedantz hann mer drei Nächte lang
und lauthals mitgesung,
un dienstags hann mer feierlich
die Kerb ins Grab gebrung."*

Doch des is alles Nostalgie,
die Zeite sinn vorbei.
Statt Kerwedanz is Disco-Night
an ä am Daa statt an drei.

Mer essen liewer Hamburger,
Pizza un Curryworscht.
Doch ebbes is genau wie frieh'r:
Mer Straußborsch hann viel Dorscht!

